

Alun Davies AC/AM
Gweinidog y Gymraeg a Dysgu Gydol Oes
Minister for Lifelong Learning and Welsh Language



Llywodraeth Cymru
Welsh Government

Ein cyf/Our ref MAP/ARD/0213/17

Lynne Neagle AC
Cadeirydd y Pwyllgor
Plant, Pobl Ifanc ac Addysg

6 Chwefror 2017

Annwyl Lynne,

Diolch ichi am eich llythyr dyddiedig 12 Ionawr ynglŷn â threfniadau ariannu Cyngor Cymreig y Gwasanaethau Ieuenctid Gwirfoddol (CWVYS) a rôl y Cynghorau Gwirfoddol Sirol o ran rhannu arferion da ym maes gwaith ieuenctid a chreu dolen rhwng y sector statudol a'r sector gwirfoddol.

Mae'n anffodus bod y Pwyllgor yn dal i deimlo nad wyf wedi ymateb i'w gwestiynau i gyd. Fy mwriad clir oedd ateb y cwestiynau a hefyd fynd gam ymhellach drwy roi gwybodaeth ychwanegol i'r Pwyllgor a fyddai'n rhoi cyd-destun i'r atebion hynny.

Wrth ymddangos gerbron y Pwyllgor ym mis Hydref, dywedais imi fod yn dilyn ymchwiliad y Pwyllgor yn ofalus gan ystyried fy safbwynt yn sgil y dystiolaeth yr oedd y Pwyllgor wedi'i chael. Wrth ystyried hyn, roeddwn yn teimlo y gallai fod yn briodol edrych ar wahanol ffordd o sicrhau cynrychiolaeth a chefnogaeth i'r sector ar 19 Hydref 2016. Ni thrafodwyd trefniadau ariannu CWVYS â'r Grŵp Cyfeirio Gwaith Ieuenctid, nac â'r sector ehangach cyn gwneud y penderfyniad hwn oherwydd ni fyddai wedi bod yn briodol trafod ariannu unrhyw gorff penodol â chyrrff eraill.

Bydd fy swyddogion yn cyfarfod yn rheolaidd â CWVYS. Cysylltwyd yn benodol â CWVYS sawl gwaith yn ystod y cyfnod cyn penderfynu newid y drefn ariannu. Ar 17 Rhagfyr 2015, cyfarfu fy swyddogion â'r Prif Weithredwr ac â Chadeirydd CWVYS i gytuno ar eu hamcanion ar gyfer grant yn 2016/17. Yn y cyfarfod hwn, trafododd y swyddogion y posibilrwydd real iawn na fyddai'r ariannu craidd yn parhau o fis Ebrill 2017 ymlaen. Yn ystod y cyfarfod, cytunwyd hefyd y byddai eu cynllun gwaith ar gyfer grant 2016/17 yn cynnwys amcan newydd ynglŷn â sut y gallai ddod yn gorff cynaliadwy. Cyfarfu swyddog hefyd â Chadeirydd CWVYS ar 14 Mawrth 2016 i drafod ariannu a chynaliadwyedd, llywodraethu a sgiliau o fewn y sefydliad.

Bae Caerdydd • Cardiff Bay
Caerdydd • Cardiff
CF99 1NA

Canolfan Cyswllt Cyntaf / First Point of Contact Centre:
0300 0604400

Gohebiaeth.Alun.Davies@llyw.cymru
Correspondence.Alun.Davies@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Mae ein cod ymarfer ar gyfer y trydydd sector yn dweud bod yn rhaid inni roi tri mis o rybudd o leiaf i sefydliadau'r trydydd sector cyn i gytundeb ariannu ddod i ben. Mae'n arfer da hefyd hysbysu'r sawl sy'n cael ei ariannu cyn gynted ag y caiff y penderfyniad ei gadarnhau. Beth bynnag yw'r farn am y ffordd y cafodd y mater ei drin, roedd fy swyddogion am roi cymaint o rybudd â phosibl am y penderfyniad i CWVYS.

Mae gofyn i Lywodraeth Cymru werthuso rhaglenni ariannu bob 3-5 mlynedd fan leiaf. Wrth adolygu'r rhaglen ariannu benodol hon, ystyriais beth oedd pwrpas gwreiddiol y cyllid sef cyfrannu at gostau craidd CWVYS i'w alluogi, ymhlith pethau eraill, i gynrychioli'r sector gwasanaeth ieuencid gwirfoddol a chynnal perthynas effeithiol ag ef. Un ystyriaeth bwysig yw bod angen sicrhau cynrychiolaeth mor eang â phosibl. Roedd ffurflen fonitro chwe-misol CWVYS yn 2016/17 yn dangos bod ganddynt 90 o aelodau. Ni chredaf fod hyn yn cynrychioli'r sector yn ddigonol.

Roedd adroddiad y Drindod Dewi Sant yn datgelu nifer o fylchau, gan gynnwys diffyg cysondeb yn y gefnogaeth i'r sector gwirfoddol drwy Gymru a diffyg ymwybyddiaeth ymhlith mudiadau gwirfoddol lleol ynghylch ymhle a sut y caiff polisi gwaith ieuencid ei ddatblygu.

O ran y pwynt yr ydych yn ei godi am y Cynghorau Gwirfoddol Sirol, gallaf eich sicrhau nad oes penderfyniad wedi'i wneud ac rwyf yn dal i ystyried opsiynau ar gyfer y trefniadau mwyaf priodol i gefnogi'r sector gwaith ieuencid gwirfoddol. Roeddwn wedi cyfeirio at adroddiad y Drindod i ddangos nad yw'r drefn 'yr un maint i bawb' yn gweithio a bod sefydliadau cenedlaethol a lleol wedi dweud eu bod yn gweithio mewn gwahanol ffyrdd sy'n golygu bod gofyn iddynt gael gwahanol fathau o gymorth.

Fel yr ydych yn cydnabod yn eich llythyr, rwyf wedi cytuno ers hyn i roi arian grant i CWVYS ar gyfer 2017/18. Fel sy'n wir am unrhyw grant, mae telerau ac amodau ynghlwm wrth y cyllid. Bydd amcanion y cyllid yn cael eu datblygu ar y cyd â CWVYS. Eleni, o'r diwedd, mae un o'r amcanion hyn y cytunwyd arnynt yn canolbwyntio ar ddefnyddio'r arian i helpu CWVYS i ddod yn sefydliad cynaliadwy. Bydd CWVYS yn datblygu cynllun gwaith sydd wedi'i seilio ar eu hamcanion ariannu ar gyfer 2017/18. Bydd fy swyddogion yn parhau i gyfarfod â CWVYS gan gydweithio â hwy drwy gydol y flwyddyn i fonitro'r cynnydd ar sail eu hamcanion.

Ar gyfer un flwyddyn yn unig y bydd y trefniadau ariannu presennol ar waith ac rwyf yn cadw'r hawl i newid y trefniadau eto os bydd gofyn gwneud pethau'n wahanol er mwyn dilyn trywydd fy mholisi.

Rwy'n gobeithio bod y wybodaeth uchod yn ddigonol i ateb y cwestiynau nad oeddech wedi cael ateb iddynt. Efallai y byddai'n dda gennych wybod, wrth ystyried adroddiad y Pwyllgor a'i argymhelliion, fy mod wedi gofyn i'm swyddogion ymgysylltu â'r Grŵp Cyfeirio Gwaith Ieuencid er mwyn imi ystyried ei farn yntau.

Yn gywir



Alun Davies AC/AM

Gweinidog y Gymraeg a Dysgu Gydol Oes
Minister for Lifelong Learning and Welsh Language